

**Kalaallit Nunaannut aammalu Kalaallit Nunaanniit timmisartuussinerni imermik
Kalaallit Nunaanni imeqarneqartumik sassaalliteqartoqartalernissaa
sulissutigineqassasoq, ilanngullugu attuumassuteqartunik suleqateqarnikkut soorlu
timmisartuutileqatigiiffiit aammalu Visit Greenland Naalakkersuisut
peqquneqarnissaannik Inatsisartut aalajangiiffisassaattut siunnersuut
*Inatsisartunut ilaasortamit Lars Poulsenimit, Siumut, saqqummiunneqartoq***

pillugu

Inuussutissarsiornermut Aatsitassanullu Ataatsimiititaliap

siunnersuutip aappassaaneerneqarneranut

ISUMALIUTISSIISSUTAA

Ataatsimiititaliap suliarinninnermini ilaasortarai:

Inatsisartunut ilaasortaq Mimi Karlsen, Inuit Ataqatigiit, siulittaasoq
Inatsisartunut ilaasortaq Juno Berthelsen, Naleraq, siulittaasup tullia
Inatsisartunut ilaasortaq Napaartoq Isak Petrussen, Demokraatit
Inatsisartunut ilaasortaq Aqqalu C. Jerimiassen, Atassut
Inatsisartunut ilaasortaq, Vivian Motzfeldt, Demokraatit

UPA2026-mi ulloq 6. maajimi siullermeerinninnerup kingorna ataatsimiititaliap siunnersuut misissorpaa.

Siunnersuutip imarisaa siunertaalu

Kalaallit Nunaannut aammalu Kalaallit Nunaanniit timmisartuussinerni imermik Kalaallit Nunaanni imerineqartumik sassaalliteqartoqartalernissaanut, takornariaqarnikkut angallassinikkullu ingerlatsivinni susasaqartut suleqatigalugit, periarfissat misissorneqarnissaat siuarsarneqarnissaallu siunnersuutikkut siunertarineqarpoq.

Kalaallit Nunaat nunarsuarmi minguinneerpaanik annertunerpaanillu imeqarfeqarpoq. Nunatsinnut nunatsinniillu timmisartuussinerni imermik Kalaallit Nunaanni imerineqartumik sassaalliteqarnikkut nunarput nunattalu tunisassiai nittarsaanneqarsinnaassapput.

Siunnersuutip Inatsisartunit siullermeerneqarnera

Siunnersuutip siullermeerneqarneranut atatillugu Naleqqamit allannguutissatut siunnersuut imaattoq saqqummiunneqarpoq:

“Kalaallit Nunaannut aammalu Kalaallit Nunaanniit timmisartuussinerni imermik Kalaallit Nunaanni imeqarneqartumik sassaalliuteqartoqartalernissaannut Naalackersuisut iliuusissanik pilersaarusiornissamut peqquneqarnissaannik Inatsisartut aalajangiiffigisassaattut siunnersuut “

Siunnersuut oqallisigilluarneqarpoq, aammalu Kalaallit Nunaanni imeqarfiit atorluarneqarnissaannut periaatsimik nassaartoqarnissaa pingaaruteqartoq kiisalu imermik kalaallinit imerineqartumik tikeraanut tunisisarnikkut Kalaallit Nunaata nittarsaanneqarnissaa iluaqutaaginnassasoq ataatsimut isigalugu isumaqataaffigilluarneqarpoq.

Air Greenlandip pilersuisutut allatulluunniit pisussaaffilerneqannginnissaata eqqumaffigineqartariaqarnera arlalinnit aamma oqaatigineqarpoq.

Tamannalu tunngavigalugu siunnersuut Inuussutissarsiornermut Aatsitassanullu Ataatsimiititaliamut suliarineqartussanngorlugu innersuussutigineqarpoq.

Siunnersuutip aningaasaqarnikkut kingunerisassai

Aalajangiiffigisassatut siunnersuutit piviusunngortinneqarneranni aningaasaqarnikkut allaffisornikkullu kingunerisassat siunnersuutip tunngavilersuutitaani nassuiaatigineqartassat Inatsisartut suleriaasianni § 33, imm. 1-imi allassimavoq.

Tamanna naapertorlugu siunnersuutip piviusunngortinneqarnerani aningaasaqarnikkut kingunerisassai nalunaarneqartut ataatsimiititaliamit maluginiarneqarpoq, tassa siunnersuummi oqaatigineqarmat ingerlatsisunik susasaqartunik, soorlu timmisartuutiqatigiiffinnik takornariaqarnikkullu suliniaqatigiiffinnik oqaloqateqarnermut suleqateqarnermullu atatillugu Naalackersuisut allaffisornikkut annikitsuinnarmik aningaasartuuteqarnissaat naatsorsuutigineqarmat.

Pilersuisunik ingerlatsisunillu isumaqatigiissutit aalajangersimasut aningaasaqarnikkut kingunerisassanut apeqqutaassapput, aqqissuussinerli niuernikkut atugassarititaasut sapinngisamik malillugit ingerlanneqarsinnaassasoq nalilerneqarpoq.

Ataatsimiititaliap siunnersuummut oqaaseqaatai

Siunnersuummi siunertarineqartoq ataatsimiititaliamit pitsaasutut isigineqarpoq. Kalaallit nioqqutissiaasa tikeraartunut Kalaallit Nunaannut Kalaallillu Nunaannit timmisartumik angalasunut nittarsaanneqarnissaat naleqquppoq.

Siunnersuutip siunertarisaa Naalakkersuisut suliassaqaarfimmi suliaanut naapertuuttoq aammalu tamanna immikkoortup sularineqarneranut atatillugu Naalakkersuisunit aamma uppersarsarneqartoq ataatsimiititaliamit maluginiarneqarpoq.

Inuussutissarsiornermik ingerlataqartut pisiortornissamut aalajangersimasunik pisussaaffilerneqartariaqannginnerannik Naalakkersuisut oqarnerat isumaqatigineqartoq ataatsimiititaliamittaaq oqaatigineqassaaq. Suliniarnermi tamanna pineqanngilaq. Pineqartoq tassaassaaq Kalaallit Nunaanni inuussutissarsiornerup ineriartortinneqarnera qanoq pitsaanerpaamik tunngavissiorneqarsinnaanersoq.

Paatsuungasoqaqqunagu ataatsimiititaliamit tikkuarneqassaaq aalajangiiffigisassatut siunnersuutip kalaallisut qulequtaani naqinnerlugaqartoq allatulluunniit kukkuneqartoq isumaqarnarmat, tassa ataatsimiititaliaq isumaqarmat ”imeqarneqartumik” allassimanani “maqinneqartumik” allassimasussaagaluartoq.

Ataatsimiititaliap inassuteqaatai

Ataatsimiititaliap isumaqatigiittup allannguutissatut siunnersuut imaattoq saqqummiuppaa inassutigalugulu akuerineqassasoq:

- Nunatsinni inuussutissarsiorturnut iluaqutaasinnaasumik aammalu nunatta nittarsaanneqarnerata ilaatut Kalaallit Nunaannut aammalu Kalaallit Nunaanniit timmisartuussinerni tunisassianik nunatsinneersunik, tassunga ilanngullugu pingaartumik imermik nunatsinni maqinneqartumik, sassaalliteqartoqartalnissaa sulissutigeqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut. Tamanna ingerlatsisunik attuumassuteqartunik soorlu timmisartuutiqatigiiffinnik aamma Visit Greenlandimik suleqateqarnikkut pissaaq.

Ataatsimiitaliap taama oqaaseqaateqarluni isumaliutissiissummilu allassimasutut paasinnil-
luni siunnersuut aappassaaniigassanngortippaa.

Mimi Karlsen
Siulittaasoq

Juno Berthelsen
Siulittaasup tullia

Napaartoq Isak Petrussen

Aqqalu C. Jerimiassen

Vivian Motzfeldt

